

ALAROBIA LAVENONA - TAONA - B



Ny Rainao izay mahita ny miafina no hamaly soa anao.

Ry Kristianina havana, amin'izao Alarobia fanosorana lavenona izao no idirantsika amin'ny vanim-potoanan'ny Karemy. Efa fantantsika mianakavy fa mandritra ny 40 andro ny karemy izay fotoana atolotry ny Eglizy hiomanantsika amin'ny fankalazana ny misterin'ny Paka izay midika hoe fandalovana (passage) ary ankalazantsika an'i Jesoa nandresy ny fahafatesana, maty izy kanefa nitsangan-ko velona.

Isika koa raha miara-maty amin'i Kristy amin'ny fahotana dia hiaraka hitsangana Aminy ka miditra amin'ny fiainam-baovao. Miala amin'ny fiainana izay tsy mendrika ny maha zanak'Andriamanitra ka miditra amin'ny fiainana maha-zanak'Andriamanitra. Vokatry ny SAFIDY nentin'ny FIOVAM-PENITRA MAHERY VAIKA (changement radical de comportement) ka mitondra antsika amin'ny NOUVEAU DEPART, FIAINGANA VAOVAO ka hahatonga antsika ho EO V MISIONERA TABERNAKLA VELONA. Izany no irintsika amin'izao Paka 2021 izao. Paka

Vakiteny I : Joely 2, 12-18

Tononkira : Salamo 50

Vakiteny II : 2 Kôr. 5, 20-6, 2

Evanjely : Mt. 6, 1-6, 16-18

MANDRESY ITY KORONTANAVIRUS ITY. Araka ny averimberintsika ny KORONTANA MIRA MANDRAKARIVA FAHOTANA. Fahotana no mitondra korontana. Manantena isika fa izao fiomanana amin'ny Paka izao dia hitondra amin'ny fiainam-baovao. Mila

mibebaka isika. Mila manao “nouveau départ”.

Izany indrindra ny antso avo nataon'i Joely mpaminany, mpitondra ny hafatr'Andriamanitra. Araky ny averintsika matetika ny mpaminany dia tsy hoe izay mahalala ny hoavy fotsiny fa indrindra ireo izay mahalala ny sitrak'Andriamanitra ka manambara azy amin'ny mpiara-belona ka hahatonga ireto farany hiala amin'ny fiainana tsy mety, miala amin'ny korontana,

miverina amin'ny Tompo ka mivelona ny fiainana maha-zanak'Andriamanitra. Nilaza i Joely mpaminany amin'ny vakiteny voalohany : *“Izao no lazain'ny Tompo: miverena amiko, amin'ny fonareo rehetra, amin'ny fifadian-kanina sy amin-dranomaso amam-pitarainana. Ny fonareo no rovidrovito, fa aza ny fitafianareo, dia miverena amin'ny Tompo Andriamanitrareo, fa mamindra fo sy miantra lzy, malain-kitezitra sy be hatsaram-po, ary ny loza afitsony dia alahelovany”*. Ny fontsika tokoa no rovitina satria avy ao no loharano sy fototra mahatonga ireny fiainana sy fitondran-tena tsy mifanaraka amin'ny sitrak'Andriamanitra ireny. Io no ampahatsiahivin'i Papa amintsika amin'ny hafatra ny karemy fa tiany isika hiverina amin'ny maha izy azy (essentiel) ny maha kristianina antsika amin'izao Karemy izao dia tsy inona fa ny maha-olon'ny finoana, ny maha-olon'ny fanantenana ary ny maha olon'ny fitiavana antsika. Nantitranterintsika ireo fototra tolagna telo ireo ao amin'ny taratasy pastôraly faha-8. Izao vanimpotoan'ny karemy izao indrindra izany no handalinantsika azy ary hivelomantsika azy eo anivon'ny fianakaviana, “eglizy kely”. Tsara ny mampahatsiahy fa ny fianakaviana ho antsika dia tsy ny ankohonana ihany fa izay rehetra vondron'olona miombona. Irina hanana départ vaovao ny fiankaviana fa indrindra amin'izao paka izao. Tanteraka izany raha mivelona ny karemy isika araka io hafatr'I Papa io. Aoka hoy izy hohararaotintsika ny vanimpotoanan'ny karemy hanampy antsika “handalinana ny finoantsika ka hahatonga antsika handray an'I Jesoa hany Marina ka ho vavolombelona ny MARINA eo anatrehan'ireo rahalahintsika. Matetika isika mamerina eto ny olana fototra eto Madagasikara dia tsy fisian'ny olona marina. Resahina matetika aoka hanjaka ny fahamarinana, ny rariny sy ny hitsiny saingy tsy tanteraka izany raha tsy misy olona mampanjaka azy izany hoe olona marina. Manana modely isika dia I Josefa ilay lehilahy marina sady tia vavaka. Mila Baba Ray tahaka an'I Md Josefa isika ka izany no nanoloran'I Papa azy ho modely amin'izao taonan'I Md Josefa izao. Manohy ny Papa ao amin'ny taratasy ka mampirisika antsika ho olon'ny fanantenana satria maro ny zava-misy mahakivy amin'izany fijoroana ho vavolombelon'ny finoana izany ka hoy izy : “Ny fanantenana dia toa ny rano velona mankahery eny amin'ny lalan'ny fiainana”, hoy ny Papa. Tsy iza io ranovelona io fa I Jesoa ilay tsy miova omaly anio ary mandrakizay. Izy no lalana sy fahamarinana ary fiainana. Tsy mikombona anefa ny fanantenana fa maniraka mandrakariva satria olon'ny fitiavana ihany koa isika. Ilay fitiavana mikatsaka ny mahasoana ny hafa ka faly raha mandroso sy mitombo izy. Ilay fitiavana mahafoy. Mila fahafoizana izao androntsika izao hialana amin'ny fitiavan-tena manapotika sy manilikilika. Ireo ezaka fototra telo no manampy antsika hivelona ny maha olon'ny finoana, fanantenana sy fitiavana : fifadian-kanina, vavaka, asa fiantrana.

Tsy zavatra ety ivelany no manapotika ny fiainantsika na manimba ny fiainantsika fa ny fontsika. Raha tiantsika hihatsara ny fiainantsika aoka isika hiezaka hanatsara ny fontsika, hanenina amin'izay tsy mety rehetra ka hiezaka hiaina ny sitrak'Andriamanitra. Potehintsika ny ratsy rehetra ao am-pontsika ao mba ho fo vaovao hitoeran'Andriamanitra sy hitoeran'i Jesoa. Izany indrindra no ezaka ataontsika amin'ny fanorenana ny EOV Eglizy olona velona

izao, isika mitoetra ao amin'i Jesoa sy itoerany ka hamokatra ny fiainantsika, ho feno hafaliana lavorary.

Matoa tsy mamokatra ny fiainantsika dia satria tsy itoeran'Andriamanitra ny fontsika satria efa feno zavatra maro ka tsy misy itoeran'i Jesoa intsony ary indrisy aza "encombré" amin'ny zavatra tsy mifanaraka amin'ny sitrak'Andriamanitra ny fontsika. Amin'izao fanombohan'ny karemy izao, aoka isika handinika tsara ny fiainantsika ka hanesotra ao am-pontsika ny "encombement" rehetra satria izany no ambaran'ny fanosorana ny lavenona. Efa potika toy ny lavenona ny fiainantsika noho ny fahotana. Tsy izany anefa no farany satria raha manaiky miara-maty amin'ny fahotana miaraka amin'i Kristy isika dia manana anjara hiaraka hitsangana Aminy ka miditra fiainam-baovao miaraka Aminy koa : **"Mibebaha, ary minoa ny Evanjely"**.

Amin'ny vakiteny faharoa dia voalaza fa izao no fotoana tsara, izao no andro sarobidy, ary izao no andro hihavanantsika amin'Andriamanitra, hoy Md Paoly. Izany no làlana hahazoantsika ny fahasoavana ao am-pontsika. Raha potehintsika ny fontsika sy miaiky ny fahotantsika isika dia efa manao dingana lehibe isika satria izany no làlana voalohany mitondra amin'ny fibebahana. Miaiky isika fa "encombré" ny fiainantsika manontolo ka manatona an'Andriamanitra sy manatona ny sakramentan'ny fampihavanana. Io no ambaran'i Md Paoly amintsika androany dia ny fahafantarantsika fa Andriamanitra dia be famindram-po ka mivonona manàtona Azy isika satria izy hampihavana antsika Aminy sady mahalala ny momba antsika manontolo : **"Mihavana re amin'Andriamanitra"**. Amin'izao karemy izao miroso amin'ny fiainam-baovao isika sady manambara fa vonona hibebaka. I Jesoa ao amin'ny Evanjely milaza amintsika ny fototra anankitelo manambara ny fibebahana sy ny toe-piainana vaovao ary ny fitondran-tena mifanaraka amin'ny sitrapon'Andriamanitra izay manambara fibebahana ka miroso amin'ny fiombonana amin'ii Jesoa :

- **Ny voalohany dia ny asa fiantrana** : manambara ny maha-zanak'Andriamanitra ny asa fiantrana satria mifanasoa ka mikatsaka sy maneho amin'ny fiainantsika ny fikatsahana ny soa iombonana ary ampiharintsika eo amin'ny fiainana. Izany dia tsy atao antso avo na hipoerapoerana na hiantsoana mpanao gazety na anaovana dokam-barotra fa atao ao am-po tokoa ka tanterahina amin'ny fiainana andavanandro satria takina amintsika ny fampitrahaofana azy amin'ny finoana. Ny fiombonana amin'Andriamanitra no mahatonga antsika manatanteraka ny asa fiantrana satria hanahafana an'Andriamanitra izay mampiposaka ny masoandro amin'ny olona rehetra. Isika koa aoka hanatanteraka ny asa fiantrana izay tsy entina hireharehana fa hanambarana ny fiombonana amin'Andriamanitra satria ny tanjona dia ny hanahafana an'Andriamanitra araka ny voalazan'i Jesoa amin'ny Evanjely androany *"Aoka izay ataon'ny tananao havanana tsy ho hitan'ny tananao havia fa Andriamanitra Ray mahita anao amin'ny mangingina no hahafantatra ny*

soa ataonao". Tsy hitadiavana tombotsoa ny fanaovana ny asa fiantrana fa fitiavana maimaim-poana tahaka ny nataon'Andriamanitra amintsika.

Izany no làlana voalohany maneho fa efa miova ny fontsika, tsy misy "encombrement" satria ny olona manao asa fiantrana dia tsy ao anatin'ny fitiavan-tena na ny fialonana na ny avonavona fa fitia tsy misy takalo, tsy misy tambiny.

- **Ny faharoa dia ny fivavahana**, izay hikatsahana ny fiombonana sy fifandraisana lalina amin'Andriamanitra. Tsy hoe hilaza isika fa tsy ilaina intsony ny mandeha an-deglizy raha miteny i Jesoa hoe : *"Ary raha mivavaka ianareo; aza mba manao tahaka ny mpihatsaravelatsihy, izay tia ny mivavaka mitsangana ao amin'ny Sinagôga sy eny anjoron-dalana, mba hahitan'ny olona azy. Lazaiko aminareo marina tokoa, fa efa azony ny valisoany. Fa ianao kosa raha hivavaka, dia midira ao amin'ny efitranonao, ka rehefa voarindrinao ny varavarana, dia mivavaha amin'ny Rainao izay ao amin'ny mangingina, ary ny Rainao izay mahita ny ao amin'ny mangingina no hamaly anao."* Ny tian'i Jesoa ambara amintsika eto dia ny fo no efitrano ka mba tsy ho voakorontana ny "encombrement" intsony fa iombonana amin'Andriamanitra izay midika koa ny fiombonana amin'ny olona rehetra. Koa mampirisika antsika handeha hivavaka hamonjy lamesa an-deglizy satria ny fivavahana faran-tampony dia ny fankalazana ny Eokaristia, mandray an'i Kristy isika raha manao kominio ka miombona tanteraka Aminy. Tsy misaraka amin'ny sakramenta hafa izany satria ny Eokaristia no sakramentan'ny fampihavanana. Amin'izao làlana iombonantsika amin'Andriamanitra amin'ny alalan'ny karemy izao ka hahatonga ny fontsika ho efitrano sy tabernaklan'Andriamanitra dia aoka àry handray ny sakramentan'ny fampihavanana isika, hazoto hamonjy lamesa sy hanao komonio masina.

Manamafy izany i Md Paoly izany raha milaza hoe : *"mihavana re amin'Andriamanitra"*. Rehefa mihavana amin'Andriamanitra isika amin'ny alalan'ny sakramentan'ny fampihavanana dia miombona amin'i Jesoa amin'ny Eokaristia ka zary tabernakla ary isika no mitondra an'i Kristy eo amin'ny mpiarabelona mba hitoeran'i Jesoa eo anivontsika. Raha hitoerany isika dia hamokatra ny fiaraha-monintsika, hamokatra ny eglizy kely fianakaviansika, hamokatra ny eglizy fototra sy iraka misy antsika ary dia hidera sy hankalaza an'Andriamanitra isika satria izany no fiainam-baovao antenaintsika amin'ny Paka.

- **Ny fahatelo dia ny fifadian-kanina**, ialantsika ny fahotana voalazan'i Papa amin'ny hafatra dia ny vola izany ka zary Andriamanitra hivavahana.... Ny kibo lasa Andriamanitra amin'izao andro iainantsika izao ka manapotika ny fiainantsika sy tsy mahatonga antsika ho "génération" mpanorina ka zary lavitry ny Eglizy Olona Velona isika satria ny fitiavan-tenantsika no ampiharintsika ka ny rendrarendra ety ivelany sy ny fitiavan-tena no fivelomantsika sy zary filamatra. Mba handresena

an'izany rehetra izany, mba tsy ho “encombré” ny fontsika dia hifady hanina isika, ilay hanina mampibaribary fa ny kibontsika no lasa Andriamanitra dia ny fitiavan-tena, tia manangona ka tsy ahafantarantsika ny hafa sy anilikilihantsika azy ireo. Aoka hamolaka ny tenantsika isika ka hiala amin'ny filan-dratsin'ny nofo, ireo no “encombrement” manapotika ny fiainantsika ka mahatonga antsika mifamono. Raha tiantsika hiditra amin'ny fiainam-baovao sy ho Paka ary hitoetra amintsika i Kristy ka hamokatra araky ny sitrak'Andriamanitra mba ho feno hafaliana isika dia aoka hifady ny filan-dratsy.

Famantarana ny fifadian-kanina sy hena ny zoma araky ny mahazatra antsika. Sao dia misy mieritreritra hoe efa niova ny lalàn'ny Eglizy, tsy niova fa isika no mafy fo araky ny voalazan'i Jesoa ka aoka isika hiverina amin'ny tena izy ka afaka handresy ny “encombrement” manapotika ny fiainantsika. Tsy ny fifadiana fe fifadiana anefa fa ny fahafoizana ifampizarana amin'ny hafa.

Ry Andriamanitra Rainay ô, milefitra lanao raha mietry tena izahay vahoakanao, mitony lanao raha manohitra ny otanay izahay. Arotsakao aminay ny fahasoavanao raha miezaka mandresy ireny “encombrement” izay manapotika ny fiainanay ireny izahay. Enga anie hanokatra ny fonao aminay lanao. Atongilano ny sofinao hihaino izao vavakay izao : enga anie izahay hahay hananararaotra izao fotoana izao, hanatanteraka ny fomba masina fanao amin'ny karemy hahatonga anay ho afa-pahotana ka ho tody soa amantsara amin'ny Paka. Raha miara-maty Aminao amin'ny fahotana izahay ry Jesoa dia hiaraka hitsangana Aminao amin'ny Paka ka hanana fiainam-baovao. Iza no fotoana sarobidy hialanay amin'izay mamatopatotra anay. Enga anie izahay ho vonona hihavana Aminao sady hahay hanatanteraka ireo asa fiombonana Aminao dia ny asa fiantrana. Enga anie izahay hamolatenana amin'ny alalan'ireny fifadian-kanina ireny ka hahay hifampizara amin'ny hafa.

Enga anie izahay hahay hanararaotra izao fotoana izao hihavanana bebe kokoa Aminao amin'ny alalan'ny sakramentan'ny fampihavanana sy Eokaristia amin'izay dia hitoetra ao Aminao izahay sy hitoeranao ka hamokatra fiainam-baovao miaraka Aminao.

Masina Maria, Md Josefa mitodika aminareo izahay amin'izao fanombohan'ny Karemy izao. Matoky ny vavakareo sy ny fitalohanareo izahay. Mivavahà ho anay mba ho fianakaviana “eglizy kely” ny fianakavianay ka hihavao tokoa ka hifanasoa, hifampitsimbina hikatsaka ny soa iombonana. Amen

Mompera Arseveka Mgr Benjamin Ramaroson